

Qershor 2018

Ftesë e hapur

Programi i OSBE-së për punë praktike

Misioni në Kosovë i Organizatës për Siguri dhe Bashkëpunim në Evropë (në tekstin e mëposhtëm "OSBE") dhe Ministria e Kulturës, Rinisë dhe Sportit (në tekstin e mëposhtëm "MKRS") ftojnë aplikantët e interesuar që të aplikojnë në programin e OSBE-së për punë praktike.

Pjesëmarrja publike e të rinjve në vendimmarrje garantohet dhe promovohet nëpërmjet një kuadri relativisht të hollësishëm dhe gjithëpërfshirës normativ dhe të politikave që rregullon fuqizimin dhe pjesëmarrjen e të rinjve në Kosovë. Ky kuadër përfshin Ligjin për fuqizim dhe pjesëmarrje të rinisë, katër udhëzime administrative (UA), si dhe Strategjinë për rininë që përcakton prioritetet dhe synimet për rininë e Kosovës. Të rinjtë kanë të drejta dhe mundësi për të ndikuar në vendimmarrje dhe politikëbërje, qoftë në mënyrë të drejtpërdrejtë, qoftë nëpërmjet organeve përfaqësuese ekzistuese dhe organizatave të shoqërisë civile.

Gjatë viteve të shkuara, OSBE ka promovuar pjesëmarrjen rinore në proceset e vendimmarrjes dhe politikëbërjes përmes qasjes së pjesëmarrjes aktive, që bazohet në parimin e të mësuarit nga përvoja dhe si qëllim ka t'i pajisë të rinjtë me shkathtësi dhe njohuri adekuate të transferueshme.

Në 2018, OSBE do të mbështesë programin tremujor të punës praktike profesionale për të rinj të moshës **20-24 vjeç**, në bashkëpunim me MKRS-në. Gjatë programit, praktikantët do të sistemohen në institucionet partnere vijuese: Ministria e Drejtësisë, Ministria për Zhvillim Rajonal, Ministria e Administrimit të Pushtetit Lokal, Ministria e Kulturës, Rinisë dhe Sportit, dhe Ministria e Shëndetësisë¹. Qëllimi i programit është që të rinjtë të angazhohen drejtpërdrejt në nivel strategjik planifikues dhe ekzekutiv të punës në institucionet kryesore vendimmarrëse dhe politikëbërëse dhe të njoftohen për së afërmi me mandatin, fushëveprimin, detyra dhe përgjegjësitë e këtyre të fundit.

Praktikantët do të vendosen nëpër zyra/divizione/departamente të ndryshme në kuadër të institucioneve bashkëpunuese ku do të zhvillohet puna praktike, varësisht nga profili dhe interesimet e praktikantëve, por edhe në përputhje me nevojat dhe kapacitetin e institucioneve bashkëpunuese. Mentorimi i praktikantëve do të bëhet nga zyrtarë të përzgjedhur në kuadër të institucioneve bashkëpunuese, ndërsa bashkërendimin do ta bëjë ekipi i projektit nga Sektori i OSBE-së për pjesëmarrje publike dhe MKRS.

¹ Lista e institucioneve partnere mund të zgjerohet tutje

Programi i punës praktike do të paraprihet nga seanca të hollësishme trajnimi hyrës, që do të organizohen bashkërisht nga ekipi i projektit i OSBE-së, MKRS dhe zyrtarët e institucioneve bashkëpunuese dhe që do të përqendrohen në: kuadrin ligjor, procesin e konsultimit gjatë hartimit të akteve ligjore dhe nënligjore, proceset e rishikimit, monitorimit dhe informimit, planifikimit dhe programimit, vlerësimit, hulumtimit dhe hartimit të dokumenteve të politikave etj. Gjithashtu, nga mesi i tetorit parashihet të mbahet edhe një trajnim në mes të programit. Programi i punës praktike do të përmbyllet me një konferencë në muajin dhjetor, ku praktikantët do të kenë rastin të paraqesin njohuritë e fituara dhe kontributin e dhënë në institucionet përkatëse ku kanë kryer punë praktike.

Vendi:

Kandidatët e përzgjedhur do të caktohen për ta kryer praktikën në objektet e institucioneve bashkëpunuese në **Prishtinë**.

Kohëzgjatja:

Programi i punës praktike do të zgjasë **tre muaj (shtator-nëntor 2018)**. **Kandidatët e përzgjedhur do të duhet të paraqiten për punë në institucionet ku janë caktuar katërmbëdhjetë ditë pune në muaj për deri në gjashtë orë punë në ditë.**²Kandidatët e përzgjedhur duhet të jenë në dispozicion për pjesëmarrje në një trajnim hyrës/përgatitor dyditor, për një seancë njëditore trajnimi nga mesi i programit, si dhe për konferencën përmbyllëse.

Kriteret për konkurrim

- Të jetë i/e moshës 20-24 vjeçare në kohën e aplikimit në program;
- Të jetë student(e) e universitetit në kohën e aplikimit në program;
- Të jetë i/e regjistruar në një fakultet në lëmet relevante (sociologji, marrëdhënie publike, shkenca politike, drejtësi, marrëdhënie ndërkombëtare, menaxhim dhe administrim biznesi, shëndetësi, studime të gjuhë angleze, etj.);
- Të tregojë interesim të sinqertë në pjesëmarrjen publike të të rinjve në vendimmarrje;
- Anëtarësi në struktura rinore (Këshilli Qendror për Veprim Rinor, Qendër Rinore) ose organizata rinore të shoqërisë civile; puna vullnetare dhe rinore është tejet e dëshirueshme (e vërtetuar më dëshmi të anëtarësisë);
- Të tregojë entuziazëm, shkathtësi të punës në grupe, motivim për punë, gatishmëri për të mësuar;
- Të jetë i/e hapur dhe të tregojë interesim për të vendosur synime, për t'i përmbushur pritjet dhe për t'iu përshtatur sfidave të programit;
- Njohuri të përdorimit të kompjuterit (programet e Microsoft-it).

² Kjo do të rregullohet më vonë me koordinatoret e programit në çdo institucion bashkëpunues.

Pagesa e propozuar:

- Secilit kandidat të përzgjedhur do t'i paguhet shuma prej **70.00 Euro në muaj** për mbulimin e shpenzimeve themelore të transportit.
- OSBE dhe MKRS nuk do të mbulojnë asnjë lloj shpenzimi tjetër që mund ta kenë praktikantët. OSBE nuk është në pozitën që të mbulojë çfarëdolloj shpenzimesh për trajtim shëndetësor apo sigurim social.

Mënyra e rekrutimit:

Kandidatët e interesuar duhet të dërgojnë CV-në (maksimum 2 faqe) dhe një letër motivimi (maksimum 1 faqe) në gjuhën angleze, shqipe ose serbe në: omikapprenticeship2018@osce.org, më së largu deri më **13 Korrik 2018**.

Kandidatët e përzgjedhur në listën e ngushtë do të ftohen për intervistë.